

## .... & Gloria

### Textprobe

Kind 1       Hesch gseh  
              De Brigadier läbt wieder

Kind 2       De läbt nümm  
              Er isch nur nomol zrugg cho

Kind 1       Min Papi isch au gschorbe  
              Aber isch nüme zrugg cho

Kind 2       Es chömed nume die zrugg wo bös gsii sind

Kind 1       Werum

Kind 2       Will do isch es weniger schön als deet

Kind 1       Ich finds do au schön

Kind 2       Ich mängisch au

Kind 1       Wo gosch ane

Kind 2       Ich mues no go de Wald pflanze

Kind 1       Was für en Wald

Kind 2       De Wald wo do mues wachse

Kind 1       Werum mues do en Wald wachse

Kind 2       Will ales wo do passiert handled im Wald

Angestellte *in der Tür der vollgestopften Materialkammer*  
Früener  
Wo de Brigadier es Chind gsii isch  
Und sin Vater dFirma gfüert het  
Isch do obe dChinderchrippe für dChind vo de Aagstellte gsii  
Die erschti Firme Chinderchrippe i de ganze Schwiiz  
dChind händ do obe chöne Spielzüüg usleene  
Do isch en Maa gsässe  
Eine wome vorem vilicht echli Angst ghaa het  
De het uusgseh wienen  
Ja  
Aber me het sich zäme gnoh  
Het gseit me hetti gern es Spielzüüg  
Denn het er eim chli aagluengt  
Het gfroget was für eis  
Denn het me gseit  
Näme mer a me hetti öppis wele us Holz  
Us Holz mit ere lange Nase  
Denn isch de Maa uufgschtande  
Isch do is Lager hindere  
Go luege obs no eine het im Gschtell mit ere lange Nase und us Holz  
Denn isch me mit dem Spielzüüg abe i dKantine  
Oder veruse  
Oder inen Egge  
Am Obig het me sSpielzüüg pünktlich wieder müese zgrugg bringe  
Suscht isch eim de Maa cho hole a de Ohre  
Het eim do ufe brocht  
Is Lager  
Und me isch sälber es Spielzüüg worde  
Ja do hets e paar verwütscht  
So isch das gsii damals  
Oder au anderscht